

# En pia memoria da Sora Longina Beer OP, Glion

G. L. 12.10.1973, nr. 82



Igl emprem d'october, tard la sera, ha il Segner clamau sia fideivla survienta Sr. Longina — ils 21 da settember haveva ella cumpleniu 77 onns — ord questa veta terrestre. Il di sissu, ils 2 d'october festivescha la baselgia la fiasta dils sogns aunghels pertgiraders. Ein forsa ils aunghels pertgiraders da quels biars affons che Sr. Longina ha tgirau ed en cass da basegns battegiau duront ils biars onns sco sora d'affons el spital «Sanitas» a Turitg, vegni encounter ad ella? Sr. Longina saveva en sia sera dalla veta mirar anavos sin ina veta pleina da merets el survetsch al concarstgaun. Gie, sia veta ei stada nuot auer ch'in survir al concarstgaun, cunzun al malsaun, agl affon pign ed al carstgaun vegli.

Naschida 1897 a Camischofes/Tujetsch, ha ella obtenu el batten il num Cristina. Sia mumma Carmelia, n. Berther, ei morta che Cristina fuva aunc in affon pign. Aschia ein ella e ses dus frars Benedetg e Gion Andriu daventai mezs orfans e la sort dad orfans ei mai stada ina leva. Segir eis ei stau grev per il bab Ignazi da stuer surschar il quita per ses affons ad auters. Parents han priu si e giu quita per els; denton la carezia dalla mumma sa negin remplazzar. Aschia han Cristina e ses dus frars gia baul stui magliar paun jester e sentir il grev daila veta.

Havend empriu da pign ensi da luvrar e seriscuder, han els tuts treis prestau il lur en la veta. Il Benedetg Beer ei igl enconuschenet hotelier a Tschamut ed ha dacuort saviu festivar ses 80 onns. Il Gion Antoni ei sereratgs giul Thurgau, ha surpriu leu in bein puril ed ha tratg si ina gronda famiglia. Siu fegl vegli, il missinari, pader Alexander, ha stuiu murir memia baul. Ils treis fargliuns ein adina seteni ensemble. Aunc la stad vargada ein els vegni ensemble a Sedrun tier ina sentupada, sminond forsa che quei savess esser per in ni l'auter il davos seveser en questa veta.

Gia cun 20 onns, pia 1917, ei Cristina entreda en claustra a Glion ed ha obtenu tier il profess 1919 il num Sr. Longina. Suenter haver giu fatg il diplom da sora da malsauns ha ella ils biars onns da sia veta surviu sco sora da malsauns: 20 onns el spital a Glion e da quei da 30 onns el spital «Sanitas» a Turitg.

Denteren ha ella era luvrar zatgei onns els asils a Trun ed a Sedrun.

Tschunconta onns el survetsch dils malsauns, tgei summa da lavur, tgei pluna da merets! El «Sanitas» a Turitg havevan ins surdau a Sr. Longina la tgira dils affons pigns; ina lavur ch'ella fageva cun grond plascher e bia carezia. Aschia ha ella sco sora astgau schenghegiar la carezia da mumma a biars affons en lur emprems dis dalla veta terrestre. Sr. Longina havess bugen aunc luvrar vinavon per ils malsauns e la glieud veglia, denton sezza malsauna eis ella stada sfurzada da seretrer anavos en claustra a Glion. En pazienzia, senza selamentar, resignada ella veglia da Diu, ha ella surportau la crusch dalla malsogna, ed ella fuva engrazievia per tut il bien ch'ins fageva ad ella.

Igl 1 d'october eis ella morta ed ils 5 d'october han ses fargliuns e parents ed ina gronda processiun da soras accumpignau Sr. Longina tier il davos ruaus sil santeri sper la claustra a Glion.

Cu pader Luci Simeon ha legiu avon en la messa da bara igl evangeli dil davos trument, parev'ei als presents sco sch'il derschader schess a sia survienta Sr. Longina: «Jeu vevel fom e ti has dau da magliar a mi, jeu vevel seit e ti has dau da beiber a mi, jeu fuvel nius e ti has vestgiu mei, jeu fuvel malsauns e ti has visitau mei... Pilver tut quei che ti has fatg al pli pign da mes frars, has ti fatg a mi. Neu e posseda il reginavel preparaus per tei.» tb

## Sedrun

### En memoria de Angelo Arrias

(Corr.) Sco la Romontscha ha rapportau mardis vargau, ei il luvrer spagnol, Angelo Arrias, daventaus gliendisdis vargau in'unfrenda d'in tragic accident d'auto denter Sedrun e Mustér. Sia mort ha provocau la condolientscha buca mo ella numerusa colonia spagnola enta Sedrun, mobein era denter la populaziun, nua ch'il defunct gudeva gronda simpatia.

Senza stravagar san ins dir, ch'Angelo era igl emigrant ideal. El ei s'adattaus a nossas relaziuns, el tschintschava pulit romontsch, el era member dell'equipa da ballapei da Sedrun. Dapis onns a Sedrun, era el els davos onns engaschaus tier la firma Albert Cavegn e serendeva il di da mort — sco usitau — tier siu liug da lavur a Schlans. Nua ch'el luvrava, seigi a Trun u a Glion, veva el fetg spert contact cun tuts. Per sia grappa era el il bien cuschinier a casa ed organisatur ded excursiuns. Sia mort ei ina greva sperdita per sia famiglia de sis affons en Noceda del Bierzo, provinzia de León. Cun ses 24 onns saveva el aunc far ina bona carriera; e surtut eisi stau ina gronda frida per siu frar giuven Pedro che luvrava cun el a Sedrun.

Gliendisdis sera ei la bara d'Angelo ida naven digl asil da s. Gions a Mustér. Biars Spagnols ein vegni per prender cumiau da lur amitg. Igl ei ca. 15 luvrers dil medem vitg che lavuran tier nus. — Mesjamna sera ha giu liug ina s. Messa pil defunct a Sedrun, celebrada dal plevon spagnol da Cuera, Don Luis Ranchal. Nossa condolientscha vala era alla firma che ha fatg tut il pusseivel per levgiar quellas uras de tristezia.

Aunc in'autra caussa. Igl ei ussa quest onn gia la sisavla bara d'in jester ch'ins ha mess el mortuari da s. Gions a Mustér. Las soras han mintgammal unfriu lur temps e lur forzas per dar als morts ina vengonza dimora. Era quella ga han elllas — sco ina buna mumma — consolau e calmau il frar giuven Pedro da 18 onns che bargeva e greva alla bara da siu frar Angelin.. Las muniesas meretan per lur survetsch da gronda carezia proximala renconuschienscha publica.

P. Am.